



17. oktober 2019

UKA 2019/40

Siverth K. Heilmann

Iqalunnut timmisartukkut pisortat aallarnigaannik aqquteqaqqilissappat tapeeriutsit assigiinngitsut qanoq ittut pisortanut, namminersortunut innuttaasunullu aningaasatigut kingunissaasa takussutissartaannik kingusinnerpaamik UKA2020-imi Inatsisartunut agguanneqartussamik Naalakkersuisut suliaqaqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Mimi Karlsen, Inuit Ataqatigiit)

Isumaq kusanartoq, nuannersoq. Takorluukkat pitsaasumik siunertallit eqqarsaatitsinni ingerlaartuarput. Inuttut piginnaasarput annerpaaq tassa eqqarsarsinnaassuseq, siunissamilu suli pisimanngitsumi siulittuisinnaanngikkaluarluta oqaatsit atorlugit takorluuilersitsisinnaaneq, upperalugulu. Nammineq, tusarnaartunullu.

Oqartarpugut maani inersuarmi oqaluinnarata piviusunngortitserusulluta. Oqartarpugut pissutsit piviusut aallaavigalugit suliniarluta inuiaqtigiaanni atukkat pitsanngorsarusullugit. Oqaatsilli suugaluarunilluunniit, pitsaasumik siunertallit, siunissamullu takorluukkat, qanorlu inerneqarumaarnissaat annillugit, ilisimangisaannarparput ilumut siunertatta kusanartup allannguinikkut pilersinneqaraluarpal, takorluukkatsitut inerneqassasoq.

Atuarfitsialak, tunngaviatigut isumassarsiatsialak pitsaanerpaamillu siunertalik akuersaarneqarlunilu aallartisarneqarpoq. Siunertamisulli inerneqarsimava? Isumassarsisup siunissamut qaamasumut takorluugaqarsimalluni massakkut Atuarfitsialaap killiffia siunertarisimavaa? Piviusunngortinneqarsimava?

Peqqinnissaqarfuiup akisussaaffittut tigujumallugu pitsaanerpaamik siunertaqluni aalajangersimaneq atuisunut naammaginartumik inerneqarsimava? Perululersilluta napparsimaveqarfippit toqqissilluta ornissinnaasarparput? Tassami inuuusuttuaqqap inersimatsikkiartuaernermini annertunerusumik akisussaaffimmik tigusiartuaalernereratut pissusissamisuuginnartutullu nunarput aamma aalajangersimavoq.

Meeqqagummi oqaluttuuttarpagut misilitakkagut naapertorlugit iliuutsit qanoq malitseqartarnerinik. Kiap nunarput oqaluttuuttarpaa aalajangiinerit qanoq inerneqassanersut? Suut misilitakkat atorlugit, oqartarnitsitut maani inersuarmi, takorluukkatsinnik oqaluttuareersimatilluta, aalajangiisimatillatalu qanoq inerneqassanersut paasisarpagut?

Nunat saniligut annertunerusumik suleqatigerusullugit oqaluttarpugut, niueqatigiinneq annertunerusoq ujartorlugu, misilitakkainnua paarlaasseqatigiumallugit. Aqqutissanik ujartuivugut imarpik ikaarlugu, taakku siunertat kusanartut ujartorlugit. Kialluunniit isumaq pitsaasumik siunertalik, anguniakkattalu takorluukkatsitut inernerilerumaagassaa assortorsinnaanngilaa.



Siunnersuutip takorluukkatsitut inernerilerumaagassaa assortunngikkaluarlugu immitsinnut aperisariaqarpugut, kikkut ilaasussatut takorloorpagut? Ataavartumik angalasoqartarnissaa qanoq qulakkeersinnaavarput? Qulakteerneqarsinnaava? Akilersinnaasumillu qanoq ingerlakkumavarput?

Inatsisartuusugut siunertanik pitsaasunik assortuinngisaannarpugut. Siunertalli qanoq piviusunngortinnissaa assortorsinnaasarpaput. Ileqqorilertigu pitsaasumik siunertalinnik akuersilluta toorsisarata, siunertalli qanoq, uterlara, qanoq pissusissamisut piviusunngortissinnaanera taasissutigisigu.

Ataavartumik akilersinnaasumillu Iqalunnut angalasinnaanissaq qulakteerniassagutsigu, paaseqqaartariaqarpaput sooq Kalaallit Iqalunnukassanersut, Canadarmiullu sooq nunatsinnukartassanersut. Taamaallaat periarfissap ammaanneratigut inuit angalalernavianngimmata. Siunertaqarlutik angalassappata paaseqqaarusuppagut taakku suunersut. Tamarmimmi feriarratilernaviaranngimmata.

Piumasarissavarpullu aamma Ilulissat periarfissaalluarmat eqqartuunitsinnut ilannguteqqullugu.

Atassummiit siunertaq pitsaasoq akerliuffiginnigarput. Paaserusupparpullu qanoq iliornikkut taanna siunertaq, takorloorneqartutuut angusinnaanerlutigut. Ataatsimiititaliamut innersuupparput.